

適園叢書

張宗祥



通國書香

吳昌碩



三國藝文志卷四

姚氏學

集之類二曰別集曰總集附錄二種曰佛經曰道書

魏武帝集三十卷錄一卷

魏武帝逸集十卷

魏武帝集新撰十卷

魏志本紀注魏書曰太祖御軍三十餘年手不捨書晝則講武策夜則思經傳登高必賦及造新詩被之管絃皆成樂章

魏志文紀注典論自敘曰上雅好詩書文籍雖在軍旅手不釋卷每每定省從容常言人少好學則思專長則善忘長大而能勤學者唯吾與袁伯業耳

袁遺字伯業汝南人袁紹

從兄見武紀初
平元年裴氏注

鍾嶸詩品曰曹公古直甚有悲涼之句

文心雕龍時序篇曰建安之末區宇方輯魏武以相王之尊雅愛詩章

隋書經籍志魏武帝集二十六卷梁三十卷錄一卷梁又有武皇帝逸集十卷亡又曰魏武帝集新撰十卷唐經籍志魏武帝集三十卷藝文志同

明張溥漢魏六朝百三家魏武帝集輯本一卷凡令教表奏事策書尺牘序祭文樂府歌辭綜一百四十五篇嚴可均全三國文編輯本三卷凡賦策表奏上書上事教令書序家傳雜文綜一百五十篇明馮惟訥詩紀輯

存樂府十四篇二十一首

魏文帝集二十三卷

魏志本紀初帝好文學以著述爲務自所勒成垂百篇

又曰文帝天資文藻下筆成章博聞彊識才藝兼該

魏志本紀注魏書曰帝八歲能屬文有逸才博貫古今

經傳諸子百家之書初在東宮疫癘大起時人彫傷帝

深感歎與素所敬者大理王朗書曰生有七尺之形死

爲一棺之士唯立德揚名可以不朽其次莫如著篇籍

疫癘數起士人彫落余獨何人能全其壽故論撰所著

典論詩賦蓋百餘篇

鍾嶸詩品曰魏文帝詩其源出於李陵頗有仲宣之體

三國志卷四
則所訂百許篇率皆鄙質如偶語惟西北有浮雲十餘
首殊美瞻可翫始見其工矣不然何以銓衡羣彥對揚
厥弟者耶

文心雕龍才略篇曰魏文之才洋洋清綺舊談抑之謂
去植千里然子建思捷而才儻詩麗而表逸子桓慮詳
而力緩故不競於先鳴而樂府清越典論辨要迭用短
長亦無憎焉但俗情抑揚雷同一響遂令文帝以位尊
減才思王以勢窘益價未爲篤論也又銘箴篇云魏文
九寶器利辭鈍序志篇云近代論文若魏文述典密而
不周

隋書經籍志魏文帝集十卷梁二十三卷唐經籍志魏

文帝集十卷藝文志同宋史藝文志魏文帝集一卷
玉海二十八中興書目魏文帝集六卷賦詩各二書表
詔一雜文一

張氏百三家魏文帝集輯本二卷凡賦詔令策教表書
序論議連珠銘文哀策誄制樂府詩綜一百九十餘篇
嚴氏文編輯本四卷凡賦詔策令教上書議書敘論連
珠銘誄雜文綜一百六十九篇繫以典論一卷馮氏詩
紀輯存樂府詩三十五篇四十二首附甄后樂府一首
魏明帝集九卷錄一卷

魏志本紀注魏書曰帝好學多識特留意於法理自在
東宮不交朝臣不問政事唯潛思書籍而已

鍾嶸詩品曰曹公古直甚有悲涼之句叡不如丕亦稱
三祖

文心雕龍時序篇明帝纂戎制詩度曲徵篇章之士置
崇文之館何劉羣才迭相照耀

隋書經籍志魏明帝集七卷梁五卷或九卷錄一卷唐
經籍志魏明帝集十卷藝文志同

嚴氏文編輯本二卷凡賦詔璽書露布論雜文綜九十
篇馬氏詩紀輯存樂府十卷

魏高貴鄉公集四卷

魏志本紀評曰高貴公才慧夙成好問尙辭蓋亦文帝
之風流也

本紀注魏氏春秋曰公神明爽儁德音宣朗罷朝司馬
景王私曰上何如主也鍾會對曰才同陳思武類太祖
本紀注帝集載自敘始生禎祥一篇傳暢晉諸公贊曰
帝嘗與中護軍司馬望侍中王沈散騎常侍裴秀黃門
侍郎鍾會等講宴於東堂并屬文論名秀爲儒林丈人
沈爲文籍先生望會亦各有名號

文心雕龍時序篇曰少主相仍唯高貴英雅顧盼合章
動言成論於時正始餘風篇體輕澹而嵇阮應繆並馳
文路矣

隋書經籍志梁又有高貴鄉公集四卷亡唐經籍志魏
高貴鄉公集二卷藝文志同

嚴氏文編輯本凡賦詔論敘綜二十四篇

魏陳思王曹植撰定前錄七十八篇

植始末具經部樂類

藝文類聚五十三魏陳王曹植文章序曰故君子之作也儼乎若高山勃乎若浮雲質素也如秋蓬摛藻也如春葩汜乎洋洋光乎膈膈與雅頌爭流可也余少而好賦其所尚也雅好慷慨所著繁多雖觸類而作然蕪穢者眾故刪定別撰爲前錄七十八篇

按傳注引典略植與楊修書曰今往僕少小所著辭賦一通相與修答書曰猥受顧賜教使刊定云云與此錄自序所言相印合其卽此錄嘗以屬楊修點定者建安十九年徙封臨菑之後事也

魏陳思王曹植集三十卷

魏陳思王曹植集二十卷

魏志本傳景初中詔曰陳思王自少至終篇籍不離於手誠難能也其撰錄植前後所著賦頌詩銘雜論凡百餘篇副藏內外

鍾嶸詩品曰魏陳思王詩其源出於國風骨氣奇高詞采華茂情兼怨雅體被文質粲溢今古卓爾不羣孔氏之門如有詩則公幹升堂思王入室又曰古詩如曹植劉楨王粲阮籍等十二人皆上品

文心雕龍明詩篇曰四言五言兼善則子建仲宣章表篇云陳思之表獨冠羣才觀其體贍而律調辭清而旨

顯應物制巧隨變生趣執轡有餘故能緩急應節矣頌
讚篇云陳思所綴以皇子爲標雜文篇云陳思七啟致
美於宏壯又曰陳思客問辭高而理疏誄碑篇云陳思
叨名而體實繁緩文皇誄末旨言自陳其乖甚矣論說
篇云曹植辨道體同書鈔封禪篇云陳思魏德假論客
主問答迂緩且已千言勞深勤寡飆炎缺焉序志篇云
詳觀近代之論文者若陳思序書辨而無當

隋書經籍志魏陳思王曹植集三十卷日本國見在書
目魏曹植集三十卷唐經籍志魏陳思王集二十卷又
三十卷藝文志同通志略陳思王集三十卷又二十卷
宋藝文志曹植集十卷

晁氏郡齋讀書志曰按魏志景初中撰錄植所著凡百餘篇隋志植集三十卷唐志二十卷今集十卷比隋唐本有亡佚者而詩文二百篇返溢於本傳所載不曉其故

陳氏書錄解題曰陳思王集二十卷卷數與唐志合其閒亦有采取御覽書鈔類聚諸書中所有者意皆後人附益然則亦非當時全書矣

四庫提要曰曹子建集十卷此本目錄後有嘉定六年癸酉字猶從宋寧宗時本翻彫蓋卽通考所載也

按通考所

載十卷本與晁志同

凡賦四十四篇詩七十四篇雜文九十二篇

合二百十篇殘篇斷句錯出其閒棄婦篇見玉臺新詠

鏡銘八字反覆顛倒皆叶韻成文實爲迴文之祖見藝文類聚皆未收入亦不免有所舛漏

嚴氏文編敘目曰曹植集十卷明郭萬程刻本又二卷明張溥百三家集本今輯本七卷凡賦五十六篇令章表疏書序頌畫贊論說銘誄雜文百四十三篇馮氏詩紀樂府詩五十六篇

按陳思王文章有前後錄景初詔撰稱前後所著百餘篇亦似指前錄後錄而言除前錄自定七十八篇後錄當二十餘疑前錄三十卷後錄二十卷隋時但有前錄唐代乃前後錄並出通志略以三十卷在前二十卷列後似亦以爲前錄後錄所以別於唐志之

顛倒歟然是否卽景初原本不可知已

魏中山恭王曹袞集

魏志武文世王公傳武皇帝二十五男杜夫人生沛穆

王林中山恭王袞袞建安二十一年封平鄉侯少好學

年十餘歲能屬文二十二年徙封東鄉其年又改封贊

黃初二年進爵爲公三年爲北海王其年黃龍見鄴西

漳水袞上書贊頌四年改封贊王七年徙封濮陽太和

二年就國五年冬入朝六年改封中山青龍三年秋袞

得疾病其年薨凡所著文章二萬餘言才不及陳思王

而好與之侔子孚嗣

明紀青龍三年冬十月己酉中山王袞薨

嚴氏文編輯存本傳所載敕令官屬敕世子各一篇皆

疾困時作也

魏侍中劉廙集二卷

廙始末具史部雜傳記類

本傳廙著書數十篇及與丁儀共論刑禮皆傳於世

吳志孫皓傳注江表傳曰初丹陽刁玄使蜀得司馬徽與劉廙論運命歷數事

文心雕龍書記篇曰劉廙謝恩喻切以至箋之爲善者也

隋書經籍志梁又有劉廙集二卷亡唐經籍志劉廙集

二卷藝文志同

嚴氏文編輯存表疏上言奏議箋答難戒凡十二篇合

以政論爲一卷

魏散騎常侍王象集一卷

魏志楊俊傳俊避地并州本郡王象少孤特爲人僕隸
年十七入見使牧羊而私讀書因被筆楚俊嘉其才質
卽贖象著家聘娶立屋然後與別魏略曰象字義伯旣
爲俊所知拔果有才智建安中與同郡荀緯等俱爲魏
太子所禮待及王粲陳琳阮瑀路粹等亡後新出之中
惟象才最高魏有天下拜象散騎侍郎遷常侍封列侯
領祕書監象旣性氣和厚又文采溫雅用是京師歸美
稱爲儒宗後文帝殺俊象自恨不能濟俊遂發病死
魏志衛覬傳黃初時散騎常侍河內王象亦與覬並以

文章顯